



Inatsisartunut ilaasortaq
Justus Hansen, Demokratit
Inatsisartut allattoqarfiat

Ukiuootumik motorinut akitsuutitigut isertinneqarnerusartut aqqutigalugit aqqusinerissaanissanut tunngasunut § 37-ikkut apeqquteqaatinut akissut.

Asasara Justus Hansen

Qujanaq apeqquteqaaternut ima nipeqartunut: *_ Ukiuootumik motorinut akitsuutitigut isertinneqarnerusartut 17 millioner koruunit – kommunit attuumassuteqartut suleqatigalugit – illoqarfinni aqqusinerissaanissanut atorneqarnissaat Naalakkersuisut pilersaarutigaat? Akissut naamiuppat, Naalakkersuisunut nassuiaqqunneqarpoq aningaasat allanut sunut atorneqarnissaat qanoq eqqarsaatigineqarnersoq.*

2011-miit atuutilersumik akitsuutinik arlalinnik qaffaanerumut, ilaatigut motorinut akitsuutinut, tunngaviusimasut tassaapput 2011-mut Aningaasaqarnermut inatsisip aningaasalersornissaa. Soorlu naluneqanngitsoq ukiuni kingullerni arlalinni Aningaasaqarnermut inatsit ilungersunartorsiorfiusarsimavoq, ilaatigut aningaasaqarnikkut ajornartorsiorneq pissutalluni, taamaattumillu nutaanik aningaasalersuisussarsionnissaq pisariaqarsimalluni tamakkua ataani akitsuutinik qaffaanerit.

Tunngaviatigut akileraarutit aningaasanut inatsimmut tunngasunut atatillugu sumut atorneqarnissaat aalajangerneqarneq ajorput, taamaattumik motorinut akitsuutinut aningaasat immikkoortinneqarsinnaanngillat aningaasartuutissanullu periarfissanik aalajangersimasunik tikkuartuilluni.

Kalaallit Nunaata ilaani ajoraluartumik aqquserngit assut ajormata iluoorpoq, kisiannili aqqusinernik ingerlatsineq kommunit akisussaaffiisa ilagaat, nalinginnaasumillu kommunit akileraarutitigut isertitaannit aningasalersorneqartarlutik, naalagaaffimmiilluunniit tapiissutinik. Aqqusinernik aserfattaaliissanerlutik imaluunniit akileraarutitigut isertitatik allanut atussanerlugit kommunalbestyrelsit ataasiakkaat namminneq sallinngortitsinissaq akisussaaffigaat.

Neriuppunga akissutikka naammaginarsimassasut, suliamillu paasinarsititsisimassasut.

Inussiarnersumik inuulluaqqusillunga

Maliina Abelsen
Aningaasaqarnermut Naalakkersuisoq

26. maj 2011
Suliap nr. 2011-050072
All.Upp.Nr. 628447

Postboks 1037
3900 Nuuk
Oqa. (+299) 34 50 00
Allak (+299) 34 63 50
E-mail: oed@nanoq.gl
www.nanoq.gl